

To'on yó'o kían nì taa San Judas nì sa'an noó nà kúú kuendá Jesús

Ká'an Judas ndisá'an

1 ¹ Yu'u kúú Judas, ta kéchóoin noo Jesucristo, ta ñanii kúú Jacobo. Ta ká'an yu'u ndisá'an xí'ín ndo'ó, nà nì kana tatá yo Ndios, ta nì nduvii ná ndo'ó, ta ñó'o ndó noo ndá'a Jesucristo. ² Ná ku'u cháá ka ini Ndios sa'a ndo, ta nakì'o cháá ka nà ñà koo va'a ini ndo, ta ná konì cháá ka nà ndo'ó.

Di'a kée taa dána'a ñà to'ón

³ Nà manì mií, sa io nduu va yu'u ñà kían taai ndi nì kee Ndios nì dakáki na yó noó kuachi yo. Tído kándaa ini ñà mián ndúsa kánian ka'an ni'inii noo ndo ñà kían ndi'i ini ndo kandita ndaa ndo xí'ín ñà ndaa kándisa yó, ñà kían iin ndée nì xì'o Ndios noó ñayuu nà. ⁴ Chì nì ku'u de'é dao taa to'ón tein ndó, ta nda mí sa'a ká'an tuti ij Ndios sa'a taa yó'o ñà ndo'o níó rá sa'á ñà kée ra. Kúú rá tã kini, chì kaá ra ñà sa'á ñà manì nì kee Ndios sa'a yo, sa'á ñoó kuu kee yó ndi ndáa mií vá ñà'a kóni ñi yo. Ta kò nákonì ra Ndios, nà kómí ndidaá tá'an choon, ta ni kò nákonì ra Jesucristo, nà kúú sato'o yo.

⁵ Ta sa ná'á vá ndó, tído dándusaa ini ndo'ó ñà tá nì ndi'i nì taó sato'o yo Ndios nà ñoo nà ñó'o tixi ndá'a ta Egipto, dá nì danaá nà ñayuu kò ní kándisa ñaá. ⁶ Dión ta'ani nì ndo'o dao ángel, chì kò ní sá ndaa va'a na choon sa komí ná, di'a nì dankoo na noó sa nì ndei na. Sa'á ñoó nì taán ñaá Ndios noo íin naá yái, ini ve'e kaa, ñà kían ni kuu o nóno, ta ñoo kaño'o na nda ná xinkoo kuu keyíko Ndios sa'a ná. ⁷ Dión ta'ani nì ndo'o nà ñoo Sodoma xí'ín Gomorra, xí'ín ndidaá ka ni nà ndéi ñoo ñó'o yati xí'án. Chì nì kee na táto'on nì kee ángel ñoó, chì nì kee na kuachi xí'ín ñi ná, ta nì kesátá ná ñà nì saki Ndios, ñà kúú kuachi ka'an noo. Sa'á ñoó nì dandó'o Ndios níó ná xí'ín ñó'ó kèi, ta ni iin kuu o ndí'i ñà kèi nà, dá ná koni iin rá iin yó tá ndó'o ñayuu kée dión.

⁸ Dión ta'ani kée taa to'ón yó'o, tá'an ra kaá ñà saní ra kée Ndios, chì dáyako ta'ani ra ñi rá xí'ín kuachi ka'an noo, ta kò nákonì ra ta né'e choon, ta ká'an ndava'a ra sa'á ñà kómí choon ná'ano. ⁹ Tído ni arcángel Miguel, nà ndáya'i cháá ka noo ángel, kò ní chíndaa noo ná dátaì kuachi na ñà u'u nani nì naá ndodó nà yikí koño Moisés xí'án. Di'a nì kaa nà xí'án: “Ná dánani mií sato'i Ndios yo'ó.” ¹⁰ Tído ta to'ón yó'o kúú ra yá'a ká'an ndava'a sa'á ñà kò kándaa ini ra, ta sava'a ñà ná'á rá kúú ñà ndáki ini ñaxintóni mií rá táto'on ndó'o kítì koó ñà nákanì ini, ñoó kían dáyako ñaá noo Ndios. ¹¹ iNda'í kúú ví rá! Dá chì ndíko ra ñà nì kee Caín, tá'an ra nì sa'ánì ñani ra. Ta ndíko ra di'ón táto'on nì kee Balaam,

ta sa kuu profeta mañá. Ta ndáne'e yú'u rá noo Ndios táto'on ni kee Coré, sa'á ñoó naá rá táto'on ni ndo'o Coré.

¹² Ta kúu rá yáko ñó'o tein ndo'ó noo ndítútí ndó sásá'an ndó sa'á ña kúu ndó kuendá Jesús, chi tein víko kée ndó ñó'o ra kée ra ña ka'an noo, ta sava'a sa'a mií vá rá nákaní ini ra. Ta kúu rá táto'on víko kua'an xoo di'a xoo di'a kée tachi, ta ko xí'o ña dai. Ta kúu rá táto'on iin yíto kuí'í ko xí'o kui'i tein yoó dákée. Sa'á ñoó kúu rá iin yíto ni xi'i uu ta'ándá, chi ko xí'o rá kui'i, ta taó ná ra noñó'o ná. ¹³ Ta kúu rá táto'on noó taño'o, ña ndákuei vei dánkoo chi'ion nda yú'u ra, ta sava'a ña dánkoo rá kían ka'an noo xí'ín ña yakó. Ta kúu rá táto'on tiñoó ná'ano xionoo ndava'a nda induú. Sa'á ñoó sa ió nduu va noo íin naá yáí, ta ñoó kandadi ni'ini ra ndidaá tá'an kuu.

¹⁴ Ta Enoc, na ni sa kuu tata kúu usa ni kixi tixi Adán, noón kúu na ni ka'an sa'a ndí kían ndo'o ta kée dión, ta di'a kaá na: “Kana'á ndó ña kasaa Ndios, na kúu sato'o yo, ta kua'á nda'o mil ángel ná kandaka na kasaa na, ¹⁵ dá keyíko na sa'a ndidaá ñayuu, dá dándó'o na níno ndidaá ñayuu kíni sa'á ña kíni ni kee na xí'ín ñaxintóni kíni kómí ná, ta dándó'o ta'ani na níno ndidaá na ni ya'a ni ka'an ndava'a sa'a ná.” Dión ni kaa Enoc. ¹⁶ Ta ká'an kuachi ta to'ón yó'o, ta kána'á ra sa'á ñayuu, ta xionoo ra kée ra sava'a ña kóni mií vá rá, ta chíndaya'i ra mií rá, ta kée ra ña ká'an va'a ra xí'ín ñayuu, dá ni'i rá ña kóni ra, chi kúu rá ta mañá.

Ká'an ni'ini Judas noó ñayuu ña kuita ndaa na xí'ín to'on Ndios

¹⁷ Tído ndo'ó, na maní mií, ndiko'on ini ndo to'on ni ka'an apóstol, na ni kaxi sato'o yo Jesucristo kane'e to'on na, ¹⁸ chi di'a ni kaa na: “Tein kuu noo ndí'i kandeí ta kediki ndaa ra ña ndaa, ta kanoo ra kee ra ña kóni mií rá.” ¹⁹ Ta ta yó'o kúu ra ndúkú ka'anda dao tá'an ndó, ta kée ra ña kóni ñíí rá, ta ko ió ta'on Espiritu ií Ndios ini ra. ²⁰ Tído ndo'ó, ñani maní, ndundéé ndó dákuá'ano ndó mií ndó xí'ín ña ndaa kándísa yó, chi ña ií kíán. Ta ka'an ndo xí'ín Ndios xí'ín ndée xí'o Espiritu ií noo ndo. ²¹ Ta koo ini ndo taxi va'a ndó mií ndó tixi ndá'a ña kú'u ini Ndios sa'a ndo, xían nani ndáti ndó kemáni Jesucristo ndo'ó xí'ín ña kataki chíchí ndó.

²² Ta koo ini ndo ka'an ni'ini ndó noó na nákaní kuáchi ini, na ko kúu ndúsá'ano. ²³ Koo ini ndo ditá ndó dao ka na noó tandó'ó ndó'o na, ña kúu táto'on ñó'o kéi ita. Ta ku'u ini ndo sa'a dao ka na, tído kandaa ndo mií ndó noó ña kíni kée na, ta nda dá'on ndíxi na kañó'ó ndó, chi yakóán xí'ín ña kíni kée na.

Kánian natiin Ndios ndidaá ñañó'ó

²⁴ Ta kándéé vá Ndios kandaa na ndo'ó, dá kían ná dá'a ni dánkoo ndó ña ndaa kándísa yó, ta kándéé ná ná chikata vii ná ndo'ó noo ió na dándáki na xí'an kádií ini ndo. ²⁵ Ta iin to'ón diní mií ná kúu Ndios, ta

iin tó'ón míí ná kúú n̄ ndichí, ta míí ná kúú n̄ dákaki ñaá. Ta iin tó'ón míí ná kúú n̄ kánian natiin ndidaá ññó'ó, xí'ín ndidaá kúú choon, ta ná dándáki na ndidaá ña'a, ta ná kakomí ná ndidaá ndée kuꝞ víti, ta ki'o dión kuií vá ná koo. Dión ná koo.